


NISTAM MEWINZHA

Mewinzha nistam gii-akiiwang gii-gichi-mikomiwan miziwe omaa noongom gaa-waabandamang aki. Piinish dash gii-ani-ningizo awe mikom. Gii-ningizod dash awe mikom amii gaa-onjiimagag owe gichi gami, gichi-saaga-igan. Piinish dash gii-ani-agaasigamaa e-ani-giizhawaayaag bizhishig, piinish noongom gaa-inigo-kwagamaag. Waabigan eta imaa gii-ayaa. Gii-ani-nitaawigin dash gegoon, awensag egii-maajii-dazhiikewaad omaa gewiina-waa, gaye bemaadiziwaad anishinaabeg.

Amii wiinawaa mooniyaag ezhinikaadamowaad iweni gaa-izhi-bakidajiwegamingin niizh siibiin, bezhig wiinibiigi-siibi shigwa assinibwaani-siibi gaa-ijigaa-degin. Baatiinwewaanagiziweg awiyag gaa-giipi-dazhiikewaad imaa gaa-izhi-bakidajiwegaming. Ogii-nagadaanaawaan odaya-iimiwaan gii-maajigoziwaad ako. Noongom dash mikigaadeniwan o-gete-aabajichiganiwaan gaa-gii-nagadamowaa-pan mewinzha. Aarkiyolojists izhinikaa zowag igiweniwag mooniyaag gaa-babaa-maanikewaad mitakamigaang e-gagwe-mikamowaad gete-gegoonan anaamakamig. Amii dash iwe gaa-wii-dazhinjigadeg omaa mazina-iganing.

NISTAM BEMAADIZIWAAD

1988 gii-izhiseg nistam gaa-gii-waabanji-gaadeg gegoon imaa gaa-izhi-bakidejiwan-gin niizh siibiin. E-moona-igewaad mooniyaag biiwaabikoon ewii-inaabikesidoowaad anaamikamig, ogii-pichi-mikaanaawaan gete gegoonan. Mewinzha inzan niizhing gii-boodawewaagobanen awiyag ima. Egii-diba-akaadamowaad idash mooniyaag iweni akiini amii enendamowaad ningodwaasomidanada-swaag daso-aki (6000) aazha imaa bi-onji-dazhiikewag anishinaabeg imaa gaa-izhi-bakidejiwangin siibiin.



Gaagii-dazhiikewaad Awiyag Mewinzha

Amii gaye iwe apii 1988 egii-mikamowaad bakaan gegoonan anaamakamig imaa chiigew asiniibwaanisiibiing. Amii ezhinamowaad mooniyaag anishinaabeg waabanong gaa-onjiwaad egii-meshkwadoonigewaad omaa nakeya-iiing. Wedi gaye shaawanong gaa-ayaaawaad bwaanag egii-biizhaawaad omaa emeshkwadoonigewaad gegoonan gichi-mook-omaanakiing egii-onjiwaad. Gaye omash kiiigoog giiledinong egii-onjiwaad. Gii-nanaandawenjigewag mashkodebizhikiwan egii-nisaawaad, egii-giigooyikewaad gaye, egii-mawinzowaad gaye, egii-maawadoonamowaad ge-miijiwaad.

Giwii-wiijitwaa na gegiin?

1984 gii-izhiseg gaa-nitaa-moonaigewaad Parks Canada gaa-onjiwaad ogii-mikaanaawaan gete ayiin gaa-inendamowaad gete-asha-waabiw in egii-inendamowaad chi-gii-ayaaawanogwen. Nongom dash dagagwe-mikigaade gegoon ge-onji-gikendamang geget inzan iwe gete-ashawaabiwin, chi-gagwe-gi=kendamang gaye aanin gaa-izhi-bimaadiziwaad mewinzha awiyag.

Giishpin andawendaman gegiin chi-wiiji'iweyin omaa bizaanigo gidaa-bigiigid chi-wiindamawishi-yaang, bi-ganoozh awiya omaa agindaasowining:

943-2223

Gemaa gaye gidaa-mooshkinebii'aan mazina'iigin imaa gaa-dazhi-moon-a'igeng.

Giish in giityaabi gegoon wii-gagwe-gikendaman gidaa-ganoonaa awe gaa-ogimaavid imaa gaa-dazhi-waakaa'igewaad mooniyaag:

Communications Manager  
The Forks Renewal Corporation  
404 Century Plaza  
1 Wesley at Main  
R3C 4C6


Chi-giigidoyin dash omaa:  
943-7752



**GAA-NANAANDWAANIKEWAAD  
IMAA GAA-IZHIBAKIDEJIWANGIN  
SIIBIIN**

**GAAII-AKIKOKEWAAD**

Amii dash miina gaa-izhigikendaagoziwaad anishinaabeg akikwa' egii-nitaa-ozhiyaa-waad waabiganing onji. Amii ogoweniwag gete-anishinaabeg gaagii-dazhiikewaagwen omaa mewinzha jibwaa-dagoshing mooniyaa. Baanima aaniish 1700 gii-izhiseg gaagii dagoshinowaad mooniyaa gaye wemitigoo-zhiwag omaa anishinaabewaking.



Gaagii-izhimikigazowaad Akikwag


Nisweaan dinookaanag anishinabe-waabiganikikwag gii-mikigazowag aazha omaa, gaawin wiin emiziweziwaad. Gaye bikwakoon gaye okani-aabajichiganan gii-mikigadewan imaa, e-onji-gikenjigaa-deg aaniin gaapi-izhi-bimaadiziwaad mewinzha anishinaabeg omaa aking.

**GII-DAGOSHING MOONIYAA SHIGWA  
GII-ADAAWED MAANITAANAN**

1737 gii-izhiseg biinish 1875 gii-maajii-adaawewag maanitaana mooniyaag waabanong gaa-gii-bionjiiwaad igiweniwag. 1737 gii-izhiseg gii-maajii-ozhibii-aanaawaa wiinawaa mooniyaag aaniin gaa-inakamigizi-waad apii omaa gii-dagoshinowaad.

Gaawin aapiji gegoon gikenjiga de-sinon aaniin mayaa gaa-inakamigan-ogwen iwe apii. Ami eta ezhi-giken daagwag iwe ashawaabiwin Fort Rouge gaa-izhinikaadeg egii-ayaamagag oma 1738 gii-izhiseg biinish 1749. Gaye anishinaabeg gaye omashkiigook gaye waasa waabanong gaa-onjiiwaad anish inaabeg egii-daawaad omaa. Igi dash mooniyaag gewiinaawaa gii-dazhiikewag imaa inake.

1810 gii-ozhichigaade Fort Gibraltar ashawaabiwin. 1816 gii-biigoni-gaade megwaa gii-miigaadiwaad niizh adaaweg Hudson Bay gaye Northwest. 1817 godag miina ashawaabiwin gii-ozhichigaade imaa naasaab aking. Gii-maamawichigewag idash igi niizh adaaweg, gaa-onji-izhinikaazowaad noongom maamawichigeg. Fort Garry noongom gii-izhinikaade iwe ashawaa biwin. 1826 gii-mooshka-an shaagooch 1835 gii-aanikechigaade. Giiyaabi




noongam gaa-giizhigag naagwan iwe gaagii-izhi-badakidag iwe gete-ashawaabiwin, imaa naawi-oodenaang. Iwe (c) gaazhibii-igaadeg. Amii iwe apii gaye gii-ozhichigaa-dedog imaa gitigaanigamig (d). 1852 dash gii-izhiseg gii-mooshka' anoon miinawaa.

**GII-MAAJII-OODENAAWANG**

(1) gaa-izhibii'igaadegin amii ini gaa-ozhichigaadegin 1873 chi-izhidaawaad gaa-oshki-dagoshinowaad mooniyaa. Amii imaa gaa-ba-badakidegin biinish 1885.

Iwe aazhogan 1882 gii-ozhichigaa-de, gete-adaawewigamig dash 1882 gaye gii-ozhichigaadedog. 1872, maamoochige ogii-ozhitoon iwe gedazhi-ozhi'ind mitadaawang bakwezhiigan. (3).



Odena gaye odaabaanimiikanawan

Waakaa'iganan gii-ozhichigaadewan (1) chi-izhidaawaad gaabi-dagoshinowaad mooniyaag 1873, gichi-chii-maaning giipi-izhi-booziwag, shaawanong egii-pi-onjiiwaad. Biinish 1885 gii-izhiseg giyaabi gaagii-badakidegin onowe-waakaa'iganan.


Amii imaa gaa-danakamigiziwaad mooniyaag chiigew Miskwaagamiwi-ziibing egii-aayaawidaawasowaad. Biinish 1889 gii-izhiseg giyaabi gii-aabadanoon gichi-ishkode-chii aanan, apii gii-biidamog ishkode odaabaanikana imaa gaa-izhi-bakidajiwegaminging niizh ziibiin. Gichi-waakaa'igan gii-badakiji-gaade imaa (4) B an B gii-izhini-kaade, giyyabi noongom badakide. 1926 wiin gii-biigwa'igaadeban gaagii-izhi-aanakechigaadegiban. (5) godag miina waakaa'iganan gii-ozhichigaadewan 1909 gii-izhiseg e'izhidaawaad mitadimoog. Niizh onowe gii-ozhichigaadewan.

Wegonen wenji-moona'iged gakina awiya omaa?

Gakina awiya odibendaan oweni imaa gaadazhi-bakidajiwegamingin ziibiin inendam mooniyaa. Shaagooch gakina awiya chi-gagwe-gikendang aaniin gaapi-izhiseg gegoon odaanaang.

Shaagooch igo gakina awiya chi-ga-shkitood chi-moona'ang gete-gegoon inenjigaade.

Gakina awiya andomaa chi-dagw id owe gagwe-gikenjigaadeg aaniin gaa-pi-izhiseg geeoon. hDa-wiijitwaawag igiweniwag gaa-inwaazowaad chi-nii-gaanishkamowaapan owe izhichigewin. Bizaanigo dash wiin da-wiijitwaawag igiweniwag awiyag gaa-wii-wiiji-twaawaad waanikeng moona'igeng. imaa gaa-danakamigag. Bizaanigo awenen igo da-wiijitwaa chi-mikigaadeg gete-gegoon imaa gaa-danakamigag.



Gaawii-dazhi-moona'igeng